

আমার খেলা যখন ছিল তোমার সনে
 তখন কে তুমি তা কে জানত ।
 তখন ছিল না ভয়, ছিল না লাজ মনে,
 জীবন বহে যেত অশান্ত ॥
 তুমি ভোরের বেলা ডাক দিয়েছ কত
 যেন আমার আপন সখার মতো,
 হেসে তোমার সাথে ফিরেছিলেম ছুটে
 সে দিন কত-না বন-বনান্ত ॥
 ওগো, সেদিন তুমি গাইতে যে-সব গান
 কোনো অর্থ তাহার কে জানত ।
 শুধু সঙ্গে তারি গাইত আমার প্রাণ,
 সদা নাচত হৃদয় অশান্ত ।
 হঠাৎ খেলার শেষে আজ কী দেখি ছবি—
 স্তব্ধ আকাশ, নীরব শশী রবি,
 তোমার চরণ-পানে নয়ন করি নত
 ভুবন দাঁড়িয়ে আছে একান্ত ॥

Parjaay: Puja, Taal: Dadra, Raag: Mishra Malhar
 Visit www.geetabitan.com for notation and other detail